

第二十一回 半畝奮三冬燭溫舉業 雙閨分兩地贈報清詞

詞曰：

魚龍寂寞需時候，權展卻，眉頭皺。五典三墳鑽要透。芸窗冷淡，雪案寒寂，日自勤昏晝。同休共戚期相守，別雁離鴻遽分手，盡把表情傾錦繡。搗詞佳句，短吟長調，贈答尋常有。

右調《青玉案》

卻說黃生改了姓名為李之華，即於寨上宿了一夜。次早，王慕荊辭了諸夥而去，同生走出城外鄉塢，地名梓香里，賃得一座書房。而慕荊仍以漁樵為業。荊則打魚，生則讀書。生每於柳下花前寄懷雲娥，淚滴青衫；追憶綠筠，愁深碧水。說不盡遠離之意，題殘尺幅，展看單箋，抱無窮憶故之思，傍他山寄跡，以佐饗餐，日惟感激不題。

卻說曾夫人與雲娥，自生起解之後，亦覺無顏吳府。一日，曾夫人對雲娥說道：“兒為此事，似傷大雅，今有何顏在此見人。且周家即在比鄰，豈不玷辱先人門面！”正在躊躇之際，忽見有少年尼姑，年方十五六上下，直進涌碧軒，求見曾夫人，且言抄化。曾夫人定眼半晌，對那少師姑說道：“師父何來？”尼姑未答，而愛月便道：“此位師姑莫非是我家惜花乎？胡為賣在嘉興，忽而金陵？又胡為易女服而尼姑？”那尼姑見愛月如此說，尼姑因細認了，急向曾夫人叩頭說道：“小尼前蒙老夫人賣與商人，商人將為妾。孰意正妻懷妒，私將小婢賣與娼家為妓。但惜花素蒙老夫人教養，豈甘失節青樓？那夜走到尼庵，祝髮皈依，法名一水。去歲同師父江南抄化，遂到金陵，寄跡於城外白梅庵。纔到吳府募緣，吳夫人命入後軒，乃得見我夫人和我小姐，實乃有緣相會。但不知我夫人和小姐因甚到此？”夫人聽了，知是惜花，便將來依顛末一一說明，且道：“我今無年可投，在此亦覺不便。”那師姑應道：“到是小尼庵中可以寄跡，祇在離城十里許，不知夫人和小姐肯去與否？”夫人聞言，不勝歡喜，乃道：“窮鳥奔林，何須擇大。有一棲身之處便可相安，有甚肯不肯。”

夫人說畢，遂帶著雲娥、愛月來到廳上，將認婢投庵之事因對吳夫人與綠筠說了一遍。吳夫人與綠筠聽了，遂百般苦留。奈曾夫人去志已決，祇管辭去。兩下難分，不得已，乃別了去。仍囑咐吳夫人道：“倘小婿黃生有些消息，伏乞命人往白梅庵相聞，老身仍命家婢時常進城問候起居。”說畢，大家各登轎，同著惜花向白梅庵而去。

那綠筠卻不忍刻下割舍，淒淒切切，無可奈何，祇得將私訂終身之事囑了一回。因口佔有二絕，以為贈別之作云：

於今索處伴無從，去去離離總悴容。

不識禪關渾近遠，深閨可得聽疏鐘。

梅花路人小橋湄，十里相思莫寄知。

還有淒涼芳草怨，傷心不獨為分離。

雲娥臨別，亦步綠筠之韻和詩二首云：

回首名流何處從？強留客地倍羞容。

心中別去還相憶，祇聽茅庵靜夜鐘。

故山遙隔碧流湄，欲歷千溪訪所知。

行客依然為寄客，那堪別地又言離。

雲娥和韻畢，綠筠小姐送至外廳，兩下相別而去。

那惜花帶著主母與雲娥小姐並愛月共為四人，不多時到了白梅庵來。遂將夫人借寓之事，與師父說知。那老師父見三人來，俱是同鄉，又是官家宅眷，遂命小尼打掃客房，整潔安靜，乃請曾夫人、小姐居住歇宿。

自是而後，曾夫人與吳夫人每欲相見，即遣婢往來，各相慰藉。不覺韶光易過，又值三春時候。春色重來，而情有所感，自見於詩詞筆墨之下。故雲娥與綠筠多以詩詞來往。綠筠嘗作四時詞，以貽雲娥云。其詞曰：

纔一別，又是陽春節。帶雨梨花門深閉，懷人腸欲折。人在天涯雨雪，一向音書斷絕。兩地心思思不竭，沾衣紅淚咽。

右調《謁金門》

紫燕掠新泥，上下雙飛東復西。不管離人添別恨，淒淒妒汝翩翩日並棲。楊柳綠盈堤，寸心轉輾望偏迷。試問白梅庵裏客，日日並香閨，春來猶憶燕雙題。

右調《南柯子》

寂寥秋夜睡，覺香鬟不整，曲欄桿外月光冷。空階積綠粘脂粉，涼夜葉交飛金井，梧桐墜，又恨同心人。思欲寄愁箋，茅庵隔遠言難盡。惟有殘燈影帳裏，相棲冷，慵起推窗。恨盼長安遠，魚雁音書難作準，幾時掛月在梧桐，卻把離情細細問。庶幾不負兩青春，寶枕垂雲方睡穩。

右調《瑞鶴仙》

片片花飛寒夜，短枕單衾。三處棲遲唯怨別，夢魂何自更追尋。隔在天涯人萬里，不知何處月偏明。有懷今夕自愁深，祇有娥娥知我心。飛葉連天作墜，梅花帶雪成林。那堪此際斷佳音，惹得慳慳病不禁。人面憐將花共瘦，不因倦寢聽雞鳴。若有夢中相見，使人無事恨離情。

右調《河滿子》

雲娥與綠筠相隔不相見，作排律貽之云：

別後情何似，明河隔素心。

妝慵頻墜髻，意懶絕鳴琴。

歲月人間異，音書天際沉。

離思愁不耐，獨坐恨難禁。

連袂歸何日，春風又變今。
淒淒留客地，寂寂閉梅林。
容比花同瘦，愁方水更深。
那堪依古剎，況乃類棲禽。
鐘鼓松堂暮，煙雲竹徑陰。
掩窗留燭焰，吟夜惜分衿。
莫訴相思苦，常凌節序侵。
半衾曾對榻，一信重如金。
夢殘心自警，人去香難尋。
以余情渺渺，知汝語悒悒。
持此聊相答，腸攢懶步吟。
卻說雲娥瞞著夫人，且常致書訪生消息，竟在白梅庵住了不題。正是：
獨有神方能駐景，休將鳳紙寫相思。

[返回 >>](#) [駐春園 >>](#)

[上一篇](#) [下一篇](#) 本書來源：[開放文學網站](#)